

Haere e te kai whangai i o matou wairua, e to matou kai-tirotiro, e te hoa o te katoa. Haere ki tou rangatira ki te Matua Nui i te rangi. Haere tenei kua mahue pani iho matou i a koe."

I te wa e ora ana tenei tangata, o nga mahi katoa, kotahi ano te mahi nui ki a ia ko taana mahi minita. Kahore ona hoki whakamuri.

No te 10 onga ra i te 2p.m. ka nehua. Na Rev. K. Karaka o Morrinsville i nehu. Ko te kauwhau i te Atirikona o Waikato, na Rev. H. P. Raiti i whakamaori. Ko te minita pakeha o te Kuiti te riiwhi o te Pihopa o Waikato. I reira ano hoki a Rev. H. K. Pou (Taumarunui) me Rev. T. Poihipi (Mercer). E 9 katoa nga minita pakeha.

WHAKAMARAMA KI NGA WHANAUNGA.

E hoa ma: I whakapanu matou i to matou kaha ki te whakamahara atu kia koutou i te aitua nei. No te ngaronga ra ano ka tae mai a koutou whakautu ki nga waea. He aha koa taria mai he reta. Tenei kei te whakaarohia tetahi take hei whakahuihui mai i a tatou. Kua whakaarohia e nga minita maori o Waikato kia whakaarahia tetahi tohu whaka mahara ki a Pene Topi ki te Kuiti. Kia riro ma te Pihopa o te Aotearoa e hura. A taua wa ka powhiritia atu koutou nga whanaunga, me nga hoa minita katoa o te Motu.

H. K. Pou.

Taumarunui 8/5/29

"TE KORE MAHI."

Dr. Wi Repa

Ko te mate nui tenei kei te ao "marama" i tenei wa. Kei Ingarangi etahi miriona tangata kaore i te whiwhi mahi. Kei te noho noaiho. Kei te rapa mahi tonu, engari kaore e whiwhi mahi. Ka hemo kai nga taane, nga wahine, nga tamariki. Ki te pakeha he mate nui whakaharahara te kore e whiwhi ki te mahi. Kei te huihui nga Ropu o te hunga mahi i ia wahi, i ia wahi o Ingarangi, o Kotarana, o Aerana. Kei te whakapae etahi no te Kawanatanga te he. Ki tena ropu, koiane tetahi o nga hara o te Kawanatanga: no reira mo pooti te Kawanatanga kia hinga. Ki etahi ma te Kawanatanga e rongoa taua mate te kore e whiwhi mahi. Ae, e te Iwi, ko te mate tenei o te ao "marama" o Iuropi, o Amerika.

Kei to tatou Motu ano taua mate e tope ana. Kei te ki nga pepa i nga korero o te kore mahi o Puneke, o Akarana, o Christchurch, o Dunedin, tae noa mai ki Turanga. Kei te aue te pakeha i te kore e whiwhi mahi. Kei te haere he